

大清仁宗睿皇帝實錄

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之二十二

監修總裁官經筵日講起居注官太子太傅武英殿大學士文淵閣領閣事稽察欽奉 上諭事件處管理工部事務翰林院掌院學士隨帶

加二級尋常加四級臣曹振鏞總裁官太子太保文淵閣大學士管理刑部事務加五級臣戴均元經筵日講起居注官太子少保內大臣文淵閣提舉

閣事稽察欽奉 上諭事件處協辦大學士戶部尚書翰林院掌院學士教習庶吉士總管內務府大臣鎮黃旗滿洲都統步軍統領管理戶

部三庫奉宸苑清漪園等處總理工程處御茶膳房御藥房太醫院西洋堂事務軍功加三級隨帶加二級尋常加十三級紀錄二十一次臣

英和經筵講官太子太保禮部尚書上書房行走武英殿總管管理園子監事務加六級隨帶加二級紀錄四次臣汪廷珍等奉

敕修

嘉慶二年丁巳九月丁卯朔

上詣

安佑宮行禮。○戊辰。勒保奏報。攻克洞洒當丈
苗寨。生擒首逆王囊仙。韋七。絡鬚。殺賊千餘。
燒斃賊衆萬餘。生擒男婦千六百名口。得旨
嘉獎。晉封勒保三等侯爵。并諭軍機大臣等。
此時首逆既擒。其附和苗寨。自必望風震懾。
官兵乘勝直前。永豐冊亨之圍。自可不攻而
解。但王抱羊一犯。與王囊仙俱係起事首逆。
必當一併擒獲。勒保應趁此兵威。曉諭降苗。

令其搜捕縛獻。以淨根株。其餘被脅悔罪苗民。妥為駕馭安撫。俾安生業。將此諭令知之。

○戶部議覆。閩浙總督魁倫奏。調劑閩省鹽務一疏。○請改奏期。以資轉運。而免誤課。查

閩省正課。六月奏銷。溢課。七月奏銷。閩省收曬。全賴夏秋趕辦。課項不能兼顧。應請展至十月十二月奏銷。以資調劑。○場員請分別裁減。以歸覈實。列嶼場大使。准其改歸浯州總場。於定額外。酌加鹽一萬二千擔。運河地

方准其增設大使一員。分管祥豐所轄西南茂林等處。定為調缺。其祥豐本缺。改為簡缺。一。商運溢引。請展限帶徵。查閩省溢課。請停徵三年。至次年分次帶徵。臣等接續算計。竟展至十年之久。懸宕已極。應毋庸議。得旨。閩省商運溢課。既據該督奏稱。從前場鹽絀產。及海潮衝失等事。以致誤運積欠。急應量為調劑。以紓積困。所奏自係實在情形。著加恩准將該省商運各幫年行溢引。自嘉慶三年

起。應辦元年溢額。停徵二年。再展至嘉慶五
年起。將應徵溢課項下。分作三年帶徵。共限
五年全行完款。庶商力益臻充裕。此係朕格
外施恩。該督等務須飭令依限全完。不得再
有懸宕。致干咎戾。餘依議。○以生擒王囊仙
等功。已革總兵官永寧。以副將用。知府慶祿。
以道員用。都司王宏信。以遊擊用。餘出力員
弁。下部議敘。賞兵丁兩月錢糧。○己巳。○
上御洞明堂。勾到秋審官犯服制及新疆情實

罪犯停決官犯五人服制斬犯八十三人絞犯二人。新疆絞犯一人。餘十四人予勾。○遣官祭

歷代帝王廟。○諭軍機大臣等。秦承恩奏。賊匪由竹山竹谿竄至白河一摺。現在陝省兵力無多。雖有鄉勇一二萬人。總須大員帶領。昨據宜綿奏。惠齡追勦賊匪。已近陝境。該處帶兵大員。有惠齡。慶成等多人。莫若令恒瑞帶兵馳赴白河。秦承恩與恒瑞併力迎擊。扼

其北竄漢江之路。防護白河洵陽。將此諭令知之。○旌表守正被戕廣東靈山縣民李萬籍妻黃氏。○庚午。賑江蘇碭山蕭二縣被水災民。並蠲緩地丁漕糧有差。免淮安徐州二府屬應徵米豆蘆課。○壬申。

上御洞明堂。勾到雲南貴州廣西情實罪犯七十三人。均予勾。○遣官祭都城隍之神。○諭內閣。向來軍營奏報打仗情形。聲敘分路帶兵之員。止列職分較大者。

數人。乃近日軍營奏報之摺。有一路帶兵之員多至數十人者。甚至將佐雜教職千把微員。概行敘入。甚屬不合。此等帶兵之員。豈皆能奮勇出力。不過帶敘其名。為將來邀恩地步。若果有超衆勇往之員。原可覈實保奏。但章奏自有體裁。軍營統領大臣等。惟知臚敘多人。以為市恩濫保之地。似此私心用事。又安能專意辦賊。是各處軍營歲事稽延。大率實由於此。著傳旨通行申飭。嗣後不得仍前

濫保以免弊混而飭戎行○諭軍機大臣等
宜綿奏攻克方山坪初閱似已得手及閱至
首逆俱向通巴一路奔逸仍未就獲所奏多
係空言此次打仗陣亡員弁多人兵勇亦有
傷亡徒損兵力著傳旨嚴行申飭此時賊首
既向通巴一路思與徐添德合夥宜綿惟當
緊躡賊蹤設法圍擒勿令會合德齡一路雖
畧有斬獲而官兵竟有受傷陣亡者看來亦
未得手著飭該員等奮力截擊至額勒登保

攻破帽子山。實不過因賊去後占據空山。而
首逆在逃。賊匪四竄。轉須處處派兵堵截。又
致百姓遭其蹂躪。實堪憤懣。額勒登保等。務
當自知愧奮。迅將賊首擒獲。並將餘匪掃除。
尚可稍贖前愆。著各傳諭知之。○以內閣學
士薩敏為盛京工部侍郎。○命翰林院編修
周厚轅。在上書房行走。○賞攻勦四川方山
坪兵丁一月錢糧。○癸酉。

孝淑皇后殯宮月祭。遣官行禮。○定婦人因姦

殺子入情實例。諭內閣。本日閱四川省情實人犯招冊內。廖氏與滕義懷通姦。因庶長子周應鶴防範嚴密。該氏商同姦夫將周應鶴殺斃一起。將廖氏依嫡母因姦故殺庶子其夫不致絕嗣。擬以絞候永遠監禁。又殷氏因與周三耀通姦。將伊子勒斃一起。將殷氏依親母因姦故殺子女例擬絞。因伊夫業經絕嗣。入於秋審情實。固屬按例辦理。但細覈前起案情。廖氏與滕義懷通姦。被周應鶴撞破。

以顏面攸關。遂爾隱忍。該氏戀姦情密。因伊子防範嚴密。不能續舊。遂起意商令姦夫滕義懷。在牆外撒土。該氏詭稱有賊。喊令周應鶴往視。滕義懷即用刀將周應鶴立時戳斃。是其子尚有愛父之心。而此婦淫邪。乃忘其夫。殘忍不仁。實出情理之外。婦道以節義為重。若身犯姦淫。罔顧廉恥。甚至因伊子礙眼。殺以滅口。是於夫婦之倫既乖。即於母子之恩已絕。無論準以母出廟絕之義。即不得復

拘泥其夫有無子嗣成例。分別辦理。況嫡母之於其子。本非所生。與親母究覺稍閒。若於此不大為之防。則淫邪之婦。恃有名分。戀姦逞殺。實不足以維風化而飭綱常。嗣後婦人因他故起釁。故殺其子者。自當仍照舊例辦理外。其因姦殺子者。毋論嫡母。親母。繼母。嗣母。俱照例分別斬絞。不論其夫有無子嗣。皆入於秋審情實辦理。其永遠監禁之條。即著刪除。此案廖氏已飭照此旨改擬。以示防維。

名節懲創邪淫至意著為令。○諭軍機大臣等。魁倫奏投首洋盜李發枝。現委員送京。其餘發往不近海洋省分。惟蔡阿四等十名仍不安分。已飭臬司鎖禁等語。該犯等俱籍隸閩省。今於本省監禁。恐其舊時夥黨於獄內勾結往來。別滋事端。該督務飭臬司將該犯等嚴行鎖禁。加意防範。以免疏虞。儻該犯等或在囹圄仍不安靜。該督即當據實奏聞。將該犯等改發黑龍江。給索倫達呼爾為奴。如

續有投首盜犯均著照此留心辦理至閩省
洋面自李發枝投首後較前已漸寧戢著傳
諭魁倫仍督飭在洋巡緝各鎮將嚴密緝捕
以靖海疆不可日久生懈將此諭令知之○
戶部議覆陝西巡撫秦承恩奏請截留難民
搭棚棲止散給口糧被害良民大口給銀二
兩小口減半均應如所請從之○撫卹浙江
臨海寧海黃巖太平定海象山玉環七廳縣
被水災民並緩徵新舊額賦緩徵歸安德清

烏程三縣水災本年額賦○甲戌

上御勤政殿聽政○

御洞明堂勾到廣東情實罪犯停決斬犯一人
餘一百五十七人子勾○諭軍機大臣等汪
新奏施南地方又有賊匪滋擾雖經派副將
樊繼祖帶兵前往但兵力無多額勒登保等
於辦竣帽子山竄匪後自應就近移師往剿
將此諭令知之○乙亥免直隸良鄉宛平通
寶坻武清霸州文安固安八州縣水災本年額